

MERKWAARDIG VONNIS GESLAGEN DOOR DE  
REGERING VAN MONTFOORT.

---

Allen den ghenen die desen brieff sullen syen off horen lesen doen wij verstaen Jacob van Compostelle Scoutt, Jan Henrix Soen, Jan van Deijl, Wouter Gerits Soen, Jan Koern ende Gijbert van Heel, Scepen tot Montfoorde dat voir onse quam Willem Gijberts Soen ende heeft hem myt sinen vryen moetwille verwilkoert ende geloeft myt sine boirgen volcomelic te houden ende te voldoen all tghene dat hier nae beschreven staet, sonder dat die voirsz. Willem Gijberts Soen dair toe gebrocht is gewest myt enegen dwanck van pyne off zeer doen als wy verstaen staende ongehouden ende ongebonden op sinen vryen voeten onder den blauwen hemel ende hemelstroon. In den eersten soe heeft die voirgenoemde Willem Gijberts Soen geloeft, dat hy Willem van Brakell, Casteleyn tot behoeff myns jonckeren van Montfoorde voiral alsulke *broeken* ende *mysliden* als hi tot desen dage toe gebroecht ende mysdaen heeft geven en betalen sall *soeve en twintich oude scilde* te betale als heeren gelt tot tween termynen te weten tot elken termyn vierthienden halven ouden scilt dair aff datten eersten termyn sall syn op den meydach nu naest comende en den anderen termyn sall wesen op Sinte Jacobsdach dair naest comende voir welke somme van soeven en twintich oude scilde voirsz. boirge gewoirden syn op die voirsz termynen te betalen Willem Aertsoen ende Aerent van Hove. Ende *den cost* den die voirsz

Willem Gysberts Soen op den huysse te Mont-  
 foirde vertert heeft den sall hi den voirsz casteleyn  
 betalen te Paeschen nu naest comende welke cost be-  
 loept *vyf Ryns gulden* ende *vyf stuner* en dair voir is  
 boirge gewoirden Gerit Coen. Ende wair dat saeke  
 dat die voirg. Willem Gysberts Soen off sine  
 boirgen voirg. van synre wegen nyet en betaelden op  
 alsulke termynen gelyc voirsz. staet soe wael van den  
 cost alse vander pryncipaell hoeftsomme voirsz. soe  
 sal die voirgenoemde Willem vervallen wesen in  
 die peen van twintich oude scilde also dick ende also  
 menichwerff als hi die termynen voirsz nyet en be-  
 taelde gelyc voirsz. staet voir welke peene off sy in  
 enich van den voirsz termyne verboirt oft versumt  
 worde dair voir hebben geloeft ende syne boirgen  
 Gerit Coen en Egbert Willems Soen. Voirt  
 soe soe est die voirgeseyde Willem Gysbert Soen  
 geloeft dat hy opten dach vander rosen nu naest  
 comende in die kerke bynen Montfoorde terstondt  
 als dat Ewangeliem vander homyssen gesongen is myt  
 hem derde een beevaert doen sall voir dat heylige  
 Sacrement en offeren aldair een Wasskerse van eene  
 ponde ende dair toe een beevaert alleen te doen  
 tuyschen dit ende meydach nu naest comende tot onser  
 liever vrouwen Tsgrevensanden dair een bethoen af-  
 brengen, dat men hem des geloeveu mach. Voirt  
 so sal die voirsz Willem gehouden wesen twe be-  
 vaerden te doen tot vermanynge des Casteleyns van  
 wegen myns Jonckeren van Montfoorde by also dat  
 hy hem voirtan anders dan wyslyck en wael gedruenge  
 dair die een beevaert off wesen sall tot onser liever

vrouwen ten eenzetell en die ander beevaert sall wesen tot Sinte Anthoenis in vyenoess. Welke twe leste beevaerden voirsz, die voirgenoomde Willem bynnen acht dagen nader voirsz vermanyngen sonder enich langer vertreck begynnen sall te doen en wesen vanden twe bevaerden voirsz hem bysonder van wegen gelyc voirsz. is eerst vermaent sullen werden dair sal hi goet betaen off brengen die gedaente hebben dat men hem des geloeven mach, ende elck van den voirsz bevaerden heeft die voirgenoomde Willem elck bisonder geloeft gesekert, en ten heiligen geswoeren te doen gelyc voirsz is by derzelver wilkoer hier na volgende. Voirt soe heeft die voirgenoomde Willem dairtoe lyflick ten heiligen gesekert en geswoeren nimmermeer tegen myne Joncker van Montfoirde sinen dieners ondersaten en vreynden te doen off te mysdoen heymelic off openbair myt woirden off myt werken, myt rade off myt dade by hem selve off by yement anders die by dair toe gewilligen mogte en by also dat hi tot eneger tyt dair in gebrecklyk viele en nyet en dede gelyc voirsz. is ende men dat op hem in eniger wys beprueve en by brengen mochte soe heeft die voirsz Willem Gysberts Sz. aen hande Willems van Brakel Castelyn voirsz voir onss scout en scepen voorg. verwilkoert syn lyf verboirt te hebben bynnen wesen heren lande men hem betreden off bevynden sall moegen tsy bynnen enigen goeden steden off dair buyten. Voirt soe heeft die voirgeseyde Willem geloeft ende gesekert by derselver wilkoer voirsz dat hi sinen boirgen voirgen. van der voirsz. borchtochten

buyten hoeren cost ende scade wael te ontheffen te vryen en te quyten. Voirt meer waert saecke dat die voirsz. Willem sine voirgeseyde boirgen menich van der voirsz. borchtchte nyet en vryede noch en quyten gelyck voirsz staet soe heeft die voorsz Willem gesekert ende ten heyligen geswoeren by der voirsz willkoer op ten derden dach nae dien dat hi nyet en betaelde op enigen termyn gelyc voirsz staet weder tot Montfoirde gevangen in te comen in alle als sulken schyn eer hi aldair vander vangnyse buyten stock ontslage waert sonder argelist. Ende tegen alle deze voirsz punten ende ellix punt dair off bisonder heeft die voirsz. Willem geloeft gesekert en gesworen nummermeer te doen noch te behelpen myt ghenen rechte geestelick noch weerlick noch myt gheenrehande subtyll vonden off vuytwege die yement ter contrarie van desen voirsz punten versien voirtstellen off bedencken sall moegen. Ende waert alle dese voirsz loefnyse borchtchte en wilkoeren voir onsen Scout ende Scepenen voirsz claerliken, ende waerastelic gesciet syn gelyc voirsz staet ende die voirsz Willem Gysberts soen dat aen onss begheert heeft over hem te willen tugen ende Certificeeren Soe hebben wy des tot enen oirkonde onse Segelen aen desen brieff gelangen.

Gegeven in 't jaer ons Heren Dusent Vierhondert Vier ende tsestig op ten yersten dach van Meert.

Het oorspronkelijke vonnis berust op het Archief der Provincie Utrecht, en is voorzien van zes kleine zegelen in groene was.